

Na nastavku svoje 4. tematske sjednice, održanom 28.03.2017. godine, Skupština Bosansko-podrinjskog kantona Goražde donijela je sljedeće zaključke vezane za Informaciju o procesuiranju predmeta ratnih zločina koji su se dogodili na području Bosansko-podrinjskog kantona Goražde u periodu 1992-1995. godina:

- Zaključci Vlade Bosansko-podrinjskog kantona Goražde:

1. Skupština BPK Goražde još jednom izražava svoje nezadovoljstvo u pogledu procesuiranja predmeta ratnih zločina počinjenih na prostoru općina u sastavu BPK Goražde.
2. Skupština BPK Goražde poziva na potpuno poštivanje ostvarivanja osnovnih načela krivičnog postupka i dostupnosti dokaza u sudskim postupcima.

- Zaključci Koordinacije boračkih udruženja s područja BPK Goražde:

1. Skupština BPK Goražde izražava nezadovoljstvo realizacijom Državne strategije za rad na predmetima ratnih zločina na području BPK Goražde iz razloga što još niko nije procesuiran za:

- opsadu Goražda kao zaštićene zone UN-a,
- kršenje zakona i običaja ratovanja,
- neselektivno granatiranje civilnih i vjerskih objekata,
- masovna ubistva civila i djece,
- uništavanje Ratne bolnice u Goraždu,
- izgladnjivanje stanovništva,
- niz drugih ratnih zločina.

2. Skupština BPK Goražde izražava zabrinutost za rad Kantonalnog tužilaštva i Tužilaštva BiH zbog:

- nepokretanja postupka protiv odgovornih za navedene ratne zločine,
- neprofesionalnog rada i nepravednog procesuiranja ratnih zločina na području BPK Goražde,
- neefikasnog korištenja resursa Tužilaštva za procesuiranje predmeta koji prema ostvarenoj posljedici prema oštećenom ne spadaju u kategoriju prioritetnih predmeta u skladu sa Strategijom.

3. Zaključci Kluba poslanika Saveza za bolju budućnost (SBB):

- Prijedlog mjera koje Skupština BPK Goražde predlaže kantonalnim pravosudnim organima:
 1. Da Tužilaštvo BPK Goražde nastavi prikupljanje podataka o svim otvorenim (i neotvorenim, za koje postoje indicije) predmetima ratnih zločina na prostoru BPK Goražde i u RS-u (Višegrad, Rudo, Rogatica, Čajniče, Foča i Novo Goražde) i unošenje svi relevantnih podataka o predmetima u jedinstvenu bazu podataka.

Takva baza podataka treba biti dostupna tužiocima koji rade na predmetima ratnih zločina na državnom nivou i u entitetima.

2. Potrebno je hitno iznaći najefikasniji način na koji će se Sudu BiH dostavljati podaci.
3. Predviđenih Aneksom B Državne strategije u vezi s tzv. predmetima iz Grupe II koje će omogućiti Sudu BiH da osigura da se najsloženiji predmeti procesuiraju na državnom nivou i garantira tužilačku diskreciju i povjerljivost. Potrebno je takođe razmotriti da se Tužilaštvo BiH imenuje kao institucija koja će prikupljati i vršiti protok informacija između sudova i tužilaštava u entitetima i Suda BiH.
4. Pravosudne institucije na kantonalnom nivou moraju biti efikasne i uvjerljive kako bi osigurale preuzimanje predmeta iz Grupe II odlukom Suda po čl. 449. stav 2. Zakona o krivičnom postupku BiH i, ako je moguće, u ranoj fazi istrage, kako bi se postigla maksimalna efikasnost postupka.
5. Tužilaštvo BPK Goražde treba zatražiti od Tužilaštva BiH interne smjernice o jedinstvenoj primjeni kriterija za ocjenu složenosti predmeta u skladu s ciljevima Državne strategije. Takve smjernice mogu izričito navesti posebne pokazatelje koji predmete čine prikladnim za ustupanje pravosudnim institucijama u entitetima i one trebaju biti dostavljene tužiocima u entitetima.
6. S ciljem uspostave dosljedne sudske prakse u primjeni kriterija za pregled predmeta, Kantonalni sud BPK Goražde treba razmotriti mogućnost uspostave stalnog tijela koje bi bilo nadležno da, na prijedlog stranaka ili po službenoj dužnosti, odlučuje o prioritetu prenošenja vođenja postupka u predmetu ili preuzimanju predmeta i kao nadzorno tijelo za provedbu Državne strategije, predvoditi hitnu provedbu svih njenih komponenti. Pored toga, članovi tog radnog tijela bi, u saradnji sa rukovodiocima pravosudnih institucija, trebali napraviti procjenu jesu li negdje potrebne alternativne mjere za postizanje ciljeva Državne strategije i identificirati i riješiti propuste u postojećim strateškim mjerama.

- **Zaključci Poslanika Nihada Čulova (SBB):**

1. Da svako boračko udruženje delegira po jednog člana za formiranje tima koji će zajedno sa Komisijom za pitanja boračko-invalidske zaštite, izbjeglih i raseljenih lica i povratnika Skupštine BPK Goražde, a na osnovu današnjih diskusija i generisanjem novih ideja, izraditi plan i strategiju, čijom implementacijom će se pokrenuti procesi sa mrtve tačke.
2. Da ovaj tim uradi analizu imovinskog stanja porodica čiji članovi su obuhvaćeni dosadašnjim procesima protiv optuženih s područja BPK iz reda pripadnika Armije RBiH i da dostavi izvještaj Vladi i Skupštini BPK Goražde.

3. Da Komisija za pitanje boračko-invalidske zaštite, izbjeglih i raseljenih lica i povratnika Skupštine BPK Goražde svaka tri mjeseca podnese izvještaj u kojoj je fazi implementacija ove strategije.

- **Zaključak poslanika Nena Zuka (nezavisni kandidat):**

Skupština BPK Goražde, na svojoj 4. tematskoj sjednici donosi preporuku upućenu svim institucijama, ustanovama i javnim preduzećima pod ingerencijom BPK Goražde na izdvajanje od 1% od svoje plate u korist Fonda koji bi bio direktno u funkciji boračke populacije – za pravnu odbranu optuženim pripadnicima Armije RBiH na području BPK Goražde za ratne zločine i samozapošljavanje, a koji će biti na posebnom kodu u okviru Ministarstva za boračka pitanja Vlade BPK Goražde.

- **Zaključak poslanika Almira Rašidovića (BPS - Sefer Halilović)**

Da Skupština i Vlada s Ministarstvom za pravosuđe, upravu i radne odnose BPK Goražde zajedno sa Tužilaštvom BPK Goražde obezbijedi što bolje i efikasnije uslove rada, a da Visoko i sudsko tužilačko vijeće obezbijedi najmanje dva tužioca koji bi se bavili ovom problematikom, kako bi se koliko toliko zadovoljila pravda.